

46512



焦太史編輯國朝獻徵錄卷之六目錄

公二

除封

追封

衍聖公

韓國公李善長

別見中書省

宋國公馮勝

潁國公傅友德

涼國公藍玉

洪國公丘福

追贈公

越國公胡大海

泗國公耿再成

郢國公馮國用

梁國公趙德勝

楚國公廖永安

虢國公俞通海

齊國公丁德興

蔡國公張德勝

蘄國公康茂才

河間郡公俞廷玉

姑熟郡公陶安

濟陽郡公丁普郎

樂浪公濮真

榮國公姚廣孝

衍聖公

孔克堅

孔希學

孔彥縉

孔弘泰

全校

刊行

焦太史編輯國朝獻徵錄卷之六目錄終

焦太史編輯國朝獻徵錄卷之六

公二

除封

追封

衍聖公

宋國公馮勝傳

王世貞

馮勝者初名國勝更名宗異最後名勝其先世繇泗

徙光州再徙濠之定遠遂為定遠人父文質有三子

長曰國用季曰勝皆驍勇饒智略國用貌都雅動止

舉舉而勝長軀偉面磊落慷慨生時黑氣滿舍若煙

霧經日不散里中異之淮南兵大起國用與勝從惡

少年數百人立砦以自固屬高帝以兵略地至鈔

山國用舍衆來謁上顧國用儒服謂曰若書生耶

試爲我計安出國用曰建康龍蟠虎踞帝王都會自古記之幸而近我其帥懦弱不任兵宜急擊下其城踞以號召四方事倣仁義勿貪子女玉帛若羣豎子者天下不難定也 上大悅曰此吾心也遂召致左右俾預進止機宜當李善長亞而有所攻戰輒掇甲直前奮擊時國用已進勝 上尤愛異之兄弟俱備宿衛從克滁州三汊河之戰國用手獲其帥與勝偕攻和之板門寨先登又敗雞籠山寇 上謀渡江國用與李善長請待舟楫而後濟會得巢湖水寨兵遂贊 上拔采石取太平上大破陳也先兵盡覆其衆

獲之赦也先與盟插血而嘔國用曰其人必叛叛形見矣也先果叛而爲其下所殺子兆先復擁大衆據方山與中丞蠻子海牙分水陸而軍以相救衆各數十萬國用等從攻破海牙已大破降兆先盡得其衆

上選降卒之驍勇者五百人爲宿衛獨國用與勝掇甲侍帳中 上寢息自如五百人皆感服 上卽

以屬國用勝將而攻金陵先登復從取鎮江俱授萬戶復從取寧國定泰興宜興俱進大元帥國用尋擢帳前親兵都指揮使專侍謀議從征金華進平紹興功最多屬疾卒 上親臨奠哭之慟賜葬江寧贈鄧

國公明年勝代爲都指揮使陳友諒陷太平進逼我
龍灣 上禦之大戰於石灰山未決勝率宿衛士直
擣其中堅遂大破之溺死者數萬俘七千人窮追至
采石復破之遂復太平師旋再從 上討友諒掩其
安慶水兵長驅至江州友諒倉皇走武昌江州平進
親軍都護張士誠以兵圍安豐丞相劉福通請救
上帥師援之福通已敗見殺安豐且下勝從解其圍
第功多遷同知樞密院事從下武昌克廬州走元將
左君弼移兵取江西諸郡復同相國達平章常遇春
合兵下淮東尋以勝圍高郵下之尋取淮安安豐從
討張士誠下吳興破執其將呂珍遂進圍蘇州踰八
月始破之論功次平章遇春進銀青榮祿大夫都督
府右都督尋從大將軍北討下徐宿青兗濟南凡得
郡國十餘立皇太子以功臣備宮案勝領詹事俄坐
小法奪一官爲都督同知總諸衛兵取樂安守將俞
勝遁獲其將右丞別部兵溯黃河會取汴梁河南二
郡西趣潼關其將張德欽等來逆戰大敗之遂奪潼
關守焉復西下華州旋師汴梁謁 上於行在 上
慰勞之拜征虜右副將軍命守汴梁還從大將軍達
下山西從武涉取懷慶踰太行克碗子城取澤州遂

取潞州轉戰平陽敗其左丞田保保徐伯昌於絳州
獲之平陽絳州平 制詔右副將軍勝居遇春下偏
將軍湯和居勝下偏將軍楊璟居和下渡河發陝西
取鳳翔李思齊走臨洮獲其大將薛平章等遂度隴
克鞏昌降其總帥汪靈真保進兵逼臨洮還從大將
軍攻圍慶陽執叛將張良臣全陝平前是 上諭達
大軍已下慶陽右副將軍權鎮之節制諸路兵馬而
大將軍與偏將軍和先還京議功賞達遂還達還之
五十餘日而勝亦至 上責之曰將軍不奉詔耶吾
欲將軍外遏虜內填撫關內所寄豈淺鮮而一旦弁

髦之何也勝頓首請死上以其功高弗忍下吏至定
賞頗列其事金幣不能當大將軍半俄復爲右都督
再以征虜右副將軍同大將軍出西安擣定西大破
王保保之師鹵其士馬數萬王保保卽擴廓帖木兒
也分兵自秦州南一百八渡徇略陽禽元平章蔡琳
遂入沔州又遣別將由鳳翔入連雲棧合攻興元克
之蜀地大震移兵平西薄征哨極於西北凱還論功
授開國輔運推誠宣力武臣特進榮祿大夫右柱國
同叅軍國事封宋國公食祿三千石賜券予告以勝
兄弟親同骨肉痛切肢體又謂勝十餘年間內則除

肝腹之患外則建爪牙之功平定中原佐成混一所以稱揚甚至賜文綺帛八十疋明年宋公勝按陝西修城隍簡士馬又明年大發兵出塞勝以征西將軍率五萬騎由西路出金蘭取甘肅以疑虜且分其勢勝至蘭州遣右副將軍傅友德以驍騎五千爲前鋒連戰敗虜遂定甘肅進至亦集乃路降其守將小顏帖木兒次別篤山口岐王朶兒只班走獲其平章長加奴等及馬駝牛羊十餘萬時大將軍達兵不利左副將軍文忠所失得相當獨勝以捷聞而有言其匿私虜橐駝馬者賞不行自是連以將軍印練兵臨清

北平繼往大同復自大同討元殘寇散不剌等還鎮陝西改河南冊其女爲周王櫛妃夫人何氏卒於京上賜璽書慰籍加餐夫人身後吾已任之卽欲南從容委事於偏將而後行與議葬畢復之鎮董建周王官府成民不告勞大將軍討虜也見不花勝以征虜將軍練兵河南待發數賜書慰勉時大將軍達左副將軍文忠皆前卒而元丞相納哈出擁大眾由金山數窺伺爲邊患上乃拜宋公勝征虜大將軍潁國公友德永昌侯藍玉左右副將軍率叅將南雄侯趙庸等以步騎二十萬乘之鄭國公常茂曹國公

隆申國公鄧鎮并子侯等皆從軍上復遣故所獲納哈出部將乃刺吾奉璽書諭之降勝等至通州謀虜有屯慶州者遣永昌侯玉以輕騎乘大雪掩之殺其平章朶來大獲士馬而還勝出松亭分築大寧寬河等四城遂駐大寧踰兩月留兵五萬守大寧以全師壓金山哈刺出見乃喇吾而驚曰爾尚在乎乃刺吾頗爲述 上恩德且示以富貴納哈出喜卽遣其左丞探馬赤等至勝軍獻馬且窺虛實勝已踰金山至女直苦屯降納哈出之將慶國公觀童初納哈出分其衆爲四一曰榆林一曰養鶩莊一曰龍安一曰

河其人畜輜重富於元主不肯預朝會召之亦不往勝大軍直前逼納哈出度不敵乃因乃刺吾請降勝使藍玉以輕兵往受之納哈出覘知明兵盛乃指天噴噴曰不復與我有此衆矣遂率數百騎詣玉約降玉大喜出酒與飲甚洽納哈出別酌所携耐疇玉玉讓之先納哈出卽先飲復酌疇玉玉解衣衣之曰請衣此而後飲納哈出讓弗肯衣玉亦持弗飲久之納哈出取酒澆地顧其下咄咄語鄭國公茂者勝子壻也時在坐勇而疎勝故欲兒子畜之茂不受且追欲自見而其部將趙指揮解胡語謂茂此且欲遁也茂

遽前搏之納哈出驚起欲就馬茂拔佩刀砍之傷臂
不得去都督耿忠遂以兵擁納哈出馳而見勝其將
士妻子凡十餘萬在松花河者聞而驚潰勝遣降將
觀童往諭之亦降凡四萬騎并得其各愛馬所部凡
二十餘萬羊馬驢馳車服至百餘里勝以禮宴待納
哈出令耿忠與同寢食遣使奏捷罪狀鄭國公班師
次亦迷河獲遺車四萬伍千輛馬數千疋傷痍及老
弱二萬四千餘 上聞大悅使使諭勝等所以勞賜
納哈出玉帶龍衣及其部曲金幣無算械鄭公茂至
京會有言勝娶虜妃及受良馬無算者又失其殿都

督濮英三千騎而茂亦自陳所以搏納哈出故且訐
勝過 上乃命收大將軍印勝還京命歸鳳陽里第
奉朝請而諸將士亦無封賞者茂削爵安置嶺右勝
自是不復將大兵有所任使如調東昌等處胡騎下
雲南按行永寧戍僉山西平陽諸郡邑兵大同屯牧
還卽上事仍奉朝請久之加太子太師時列勳臣望
重者八人勝仍居第三賞賜黃金至三百兩白金二
千兩鈔萬錠 上春秋高多所猜忌而勝號爲雄勇
又時時失 上意洪武二十八年暴卒諸子皆不得
封而國用之子誠積戰功雲南累官至中軍都督府

左都督 贊曰馮國用不死其在韓公岐陽伯仲乎
勝有大將材積戰功久而其中不能無欲且又時時
見驚桀焉能免乎金山之役璽書凡三下以中山開
平二王爲喻始而勉之中而戒之終而愧焉雖然勝
功大罪不能相掩謫廢可也嫌死不可也不王可也
不侯不可也今世知六王不知六王之爲韓宋二公
而後不王者作李善長馮勝傳

潁國公傅友德傳

袁 袞

傅友德者宿州人也徙居潁川碭山元末從李喜之
起兵山東轉攻剽入蜀喜之敗歸明玉珍玉珍不能
用乃率所部走武昌從陳友諒辛丑上攻江州至小
孤友德率衆降上才之使將兵從常遇春攻廬州友
諒圍洪都從上親征大戰彭蠡湖友德以樓船犯其
前鋒身被數創戰益力殺數百人復與諸將邀擊禁
江口友諒死復從上親征武昌督兵攻城城東南有
山名高冠下瞰城中上問諸將誰能奪此友德卽率
萬人先登一鼓奪之矢中面及脇下鏃出腦後不顧

武昌平以功擢雄武衛指揮使與徐達攻拔廬州取夷陵衡州襄陽攻安陸身被九創擒其守將任亮取淮東泰州進攻淮安破張軍於馬螺港獲戰船千餘大破竹貞兵於安豐所過焚元軍積聚吳元年守徐州王保保遣驍將李貳來寇伺其出掠乃將步騎二千泝呂梁捨舟登陸擊之賊將韓乙迎戰友德躍馬奮槊刺乙墜馬賊敗走友德度李貳必益兵來鬪趨還城開門出兵陣於城下令士卒皆臥鎗以待聞鼓聲卽起擊有頃李貳至友德鳴鼓士皆奮起疾鬪賊大敗生擒李貳獻俘京師上勞賞之命以鼓吹送還

第拜江淮行省叅政大將軍徐達等北征中原上諭之曰征伐所以奉天命平禍亂安生民故命將出師必在得人叅政傅友德勇略冠諸軍可領一軍使獨當一面復諭友德曰此行當努力昔漢高祖與項羽爭衡彭越宣力於山東今用師自山東始汝其勉之進攻沂州斬王宣下青州敗元將也速取萊陽洪武元年取東昌棣州樂安攻克汴梁河南洛陽及諸山寨關陝平上命取元都友德引兵渡河取衛輝彰德遂下廣平克臨清德州滄州通州進克元都復將兵偵邏古北諸隘口追元殘兵獲馬一千六百疋牛羊

八十餘頭車二百五十輛略大通而還狗下保定中山真定略平度州遂克太原初擴廓帖木兒自太原出鴈門將由居庸以攻北平友德同大將軍等乘虛徑擣太原擴廓至保安州聞之還師來援其鋒甚銳兵交萬騎突出友德帥敢死士五千騎追却之因夜伏兵襲其營擴廓方明燭坐帳中聞變擾亂亟納靴跣一足踰帳後出乘馬遁去友德追至上門關不及而還獲甲士四萬馬稱是敗元將賀宗哲於石州擊走四大王及竹貞兵敗脫列伯於宣府同大將軍取陝西下鳳州鞏昌臨洮攻克慶陽陝西悉平大賞諸將賜友德白金文綺三年復命友德同大將軍等出潼關以擣定西敗王保保兵保保北遁乘勝取蜀友德爲前鋒出秦州奪略陽關擒僞夏平章蔡琳遂入沔州分兵由鳳翔入連雲棧合攻漢中克之尋以饋運不繼還軍西安夏將吳友仁寇漢中守將金興旺遣人求救友德率精銳三千攻斗山寨下令十人持十炬燃於山上友仁軍望見列炬起大驚夜遁去大封功臣封潁川侯是年冬命將分道伐蜀湯和廖永忠等由瞿塘趨重慶拜友德爲征虜前將軍由秦隴趨成都上密諭友德曰蜀人聞吾西伐必悉其精銳

木牌
浮信

東守瞿塘北阻金牛以拒我師若出其意外直搗階
文門戶既墮腹心自潰兵貴神速但恐不勇耳友德
受命馳至陝集諸道揚言出金牛潛使人覘階文守
備單弱引兵出陳倉攀緣山谷晝夜兼行直抵階州
守將丁世珍率衆拒戰擊走之克階州遂趨文州蜀
人斷白龍江橋以阻我師友德督兵修橋以渡破五
里關拔文州渡青州果陽白水江蜀人望風驚遁遣
人諭降之引兵趨綿州阻漢江不得渡下令軍中造
戰艦百餘艘以濟師欲以軍中消息達湯和而山川
懸隔適江水暴漲乃以木牌數千書克階文綿州口

月投江漢順流而下蜀守者見之咸解體尋拔漢州
初夏人聞王師伐蜀命丞相戴壽太尉吳友仁等悉
衆守瞿塘及聞友德破階文乃分兵還援漢州以保
成都未至而友德已逼漢州向大亨悉兵出戰城下
擊敗之壽等至友德下令曰彼勞困遠來聞大亨敗
衆必洶洶可一戰而擒也乃親督兵迎擊壽壽大敗
遂拔其城是時湯和駐兵大溪口未進上引友德冒
險克敵功以責之而和亦得木牌於江流遂進師次
夔州友德進圍成都戴壽向大亨等出城拒戰以象
代甲士列於陣前友德命以弓矢火器攻之象中矢

大正 製 蜀 德 友 功 第一 廖 永 忠 功 第二 近 蜀 解 元 正 孝 忠 鄉 誠 智 平 西 蜀 表 有 云 蜀 四 巴 三

救 彈 九 黑 子 之 地 傳 一 廖 二 成 大 統 至 夏 天 時 服 身 博 然

却走壽兵躡藉死者甚眾友德亦中流矢會湯和遣人報重慶之捷壽等遂無鬪志乃藉府庫倉廩以降得士馬三萬分兵徇下州縣之未附者克保寧執吳友仁械送京師蜀地悉平師還論功詔曰潁川侯傳友德冒越險阻首克階文破綿漢成都保寧諸郡功最大賞白金貳佰伍十兩文綺二十表裏御製平蜀文以旌之五年副征西將軍馮勝北征沙漠敗失刺罕於西涼至永昌敗朵兒只巴獲馬羊十餘萬攻甘肅射死平章不花降太尉瑣納兒等獲馬萬匹六年大軍復出鴈門西北巡長城外友德為前鋒虜遠遁

追獲平章鄧孛羅帖木兒軍還留鎮北平上疏陳五事一轉輸宜令河間軍自長蘆運至通州北平軍自通州運入城永平民陸運至北平道頗遠宜通清河涑水故道二流民越境為邊患宜招輯寬其賦役優免三年則民皆安居矣三古北口等處兵民一夫守關二夫供輸有名無實宜放還民夫使力田令守軍千人代守責專則邊事寧矣四關外新附之民甚貧宜給以衣糧厚恤之則戶口日增矣北平府縣連年供億大軍宜少紓其力上嘉納之召還從皇太子諸王講武荆山下九年率兵延安以備伯顏帖木兒設

狀收錄 卷之六 十一 曼山館

伏大破之俘獲無算其麾下縛伯顏帖木兒以降上將平雲南命友德巡行川蜀永寧雅播等處修城郭治關梁於是金筑普定諸山寨酋長相率來降還京獻馬五百上選內廐馬十五賜之十四年同大將軍出塞討元平章乃兒不花等渡北黃河虜騎駭遁友德選輕騎夜襲灰山克之九月拜征南將軍藍玉沐英副之統兵三十萬征雲南上曰雲南僻在遐荒行師之際當知其山川形勢以規進取朕嘗覽輿圖咨詢於衆得其扼塞取之之計當自永寧先遣驍將列卒一軍以向烏撒大軍自辰沅以入普定分據要害

乃進兵曲靖雲南之喉襟彼必併力於此以拒我師審察形勢出奇取勝正在於此既下曲靖三將軍以一人提勁兵趨烏撒應永寧之師大軍直擣雲南彼此牽制疲於奔命破之必矣雲南既克直分兵先取大理先聲已振勢將瓦解其餘部落可遣人招諭不煩兵也師行上出餞龍江友德至湖廣分遣都督胡海洋等率兵五萬由永寧趨烏撒大軍由辰沅趨貴州攻普定普安下之進取曲靖梁王把匝剌瓦邇齊遣平章達里麻將精兵十餘萬以拒我師友德用沐英計濟道疾趨未至曲靖忽大霧冒霧至白石江頃

之霧霽虜見之大驚我師陽欲渡江而潛遣數千人
從下流以渡出其後遍樹旗幟金鼓忽震達里麻急
徹軍以禦而我師畢濟矣旣陣友德麾軍大戰矢石
齊發呼聲動天地縱鐵騎擣之虜大敗生擒達里麻
俘其衆萬計悉縱之使歸本業遂平曲靖友德自將
兵擊烏撒城之分遣副將軍下雲南梁王走死通畢
節克可渡河於是東川烏蒙芒部諸蠻皆震襲降附
盡克大理擒土酋段世分兵略下鶴慶麗江金齒車
里平緬皆降烏撒蠻復叛討破之斬首三萬餘級獲
馬牛羊數萬復遣兵搜捕蠻黨之未服者殺之雷翠

款附蠻地悉平上數遣使者勅諭勞友德十六年上
命長興侯耿炳文往諭友德等班師且日遲速之期
宜自審度友德乃因其土俗定賦稅廣屯田興學校
創設諸司大小相維犬牙相制邊境以寧十七年凱
還上深慰勞之進封潁國公十九年再征雲南二十
二年復統番漢軍討曲靖普安等處蠻平之二十三
年征沙漠至迤都山擒乃兒不花復征西路寧夏二
十四年北征追故元遼王方進兵遽下令班師虜信
之少懈趣師深入掩襲虜衆而還袁袞曰明興猛將
雲從數倍雲臺凌烟而六王最著其以驍勇稱者莫

如常開平次則傳頴國耳觀其下蜀掃滇踰險隘涉
荒遠席卷颺馳譬之良駿超軼絕塵而造父爲御奮
迅騰驟一日千里其用兵方略悉稟廟算是豈泛駕
者哉

自藍王敗友德與宋公相繼暴卒子孫不得襲封

涼國公定遠藍玉傳

國史實錄

玉鳳陽定遠人其女兒歸開平王常遇春因隸遇春
帳下長身頰面言動異等輩臨陣突圍所向有功遇
春甚獎愛上亦以遇春故特寵任之歲壬寅授充管
軍鎮撫甲辰授武德衛千戶乙巳轉親軍千戶吳元
年陞武德衛指揮僉事尋陞指揮使洪武元年冬陞
大都督府僉事十一年同西平侯沐英率兵征西番
擒其酋長瘦唃子三副使獲馬二萬餘匹牛羊十餘
萬頭十二年秋班師封永昌侯十四年爲征南右副
將軍同永川侯傅友德西平侯沐英帥師取雲南故

元平章達里麻於曲靖而王巴匝刺瓦爾密走死須
他次取火理鶴慶麗江建昌金齒車平緬地方萬里
皆入職方玉功名居多十八年冊玉女爲蜀王妃二
十年正月爲征虜右副將軍宋國公馮勝北征五月
遇故元丞相納哈出於金山納哈出遣使納降一月
期會軍門置酒飲與玉同席因酌酒勸酌玉解衣以
衣納哈出不肯服玉亦不飲酒爭讓久之納哈出覆
酒故不下不語鄭國公常茂察其中變因致酒聽復
其壁擁至勝營其衆驚潰玉率輕騎追至亦迷河降
其衆數萬而還八月詔宋國公馮勝行總兵分駐綿

川冬十月移屯蘄州休養拜征虜大將軍二十一年
四月進兵踰嶺而北至捕魚兒海直擣虜營虜驚潰
獲其次子他保奴及妃諸王太尉平章等四千四百
餘并寶金璽銀印車輛軍士家屬六萬九千余口盡
驅馬驢駝雜畜捷至上命通政使常茹等賫勅書往
勞當擬封玉梁國公適有發其私元主妃者上聞之
怒事遂中止至是念其勞改封涼國公仍鐫過是于
券是月朔叛酋資等率衆寇普安燒府大肆剽掠征
南將軍穎國公傅友德等率兵擊之斬其營長者滿
巴青初玉以開平王常遇春妻弟屢從征伐有功胡

陳之反玉嘗聞其謀上以開平之功及親親之故宥而不問後諸老將多歿及擢爲大將總兵征伐所至克捷甚稱上意然王素不學性復狠愎見上待之厚又自恃功伐專恣暴橫畜壯奴假子數千人出入乘勢漁獵常占東昌民田民訟之御史按問玉擅逐御史及征北還私其駝馬珍寶無算夜渡喜峰關關吏以夜不卽內玉大怒縱兵毀關而入上聞之不樂玉復不省嘗見上命坐或待宴玉動止傲悖無人臣禮及總兵在外擅陞降將校黥刺軍士甚至違詔出師恣作威福以脇制其下至征西還奏凱陞爵命爲太

傅玉怒攘袂大言曰吾此回當爲太師乃以我爲大傅及時奏事上惡其無禮不從玉退語所親曰上疑我矣乃謀反當是時鶴慶侯張翼留安侯陳桓景川侯曹震船舫侯朱壽東莞伯何榮都督黃恪吏部尚書詹徽侍郎傅友文及諸武臣嘗爲玉部將者玉乃密遣親信召之晨夜會私宅第謀收集士卒及諸家奴伏甲爲變約束已定爲錦衣衛指揮使蔣瓖所奏羣臣訊狀具實皆伏誅

錦衣指揮蔣瓖告玉謀反簿錄其家凡有片紙隻字者並逮獄 上集羣臣廷議玉強辯展轉攀染不肯

服吏部尚書詹徽叱玉吐實無徒株連人玉大呼曰
徽卽吾黨遂併殺徽及詩人王行孫蕢是歲九月詔
曰藍賊爲亂謀泄族誅者已萬五千人自今胡黨藍
黨皆赦不問徽素刻薄嘗陷李善長又惡解縉爲虞
部郎中王朝用草疏申救善長并欲中縉危法懿文
太子亦恨徽徽與太子錄囚太子欲開釋徽輒文附
重法太子爲白 上先入徽言謂太子曰徽執者法
也太子因言立國以仁厚爲本 上笑曰汝欲遂自
爲皇帝耶太子懼因感疾卒謂建文君曰詹徽殺我
建文君爲太孫錄藍獄命先斷徽手足戮於市

封爵考

洪國公丘福

丘福鳳陽人以小卒事 成祖藩邸積年勞授護衛

千戶靖難兵初起與朱張二王首建義奪九門轉戰
真定夾河滄州靈璧先登有功累陞中軍都督建文
四年封淇國公食祿二千五百石與世券當是時修
功詔福第一福善高煦數勸 上立高煦爲太子上

不許福質直無文有勇力善戰輒輕敵深入永樂七
年爲征虜大將軍總兵武城侯王聰同安侯火真左
右副總兵靖安侯王忠安平侯李遠左右叅將並出
塞擊虜 上曰本雅失理逆天道羈信使命爾徂征

自開平以北卽不見虜時時如對敵日夜嚴斥望遇虜設奇奮擊否則審察事機便宜進止又密授方略臨遣福出塞率千餘人先至臚胸河南遇虜遊兵與戰敗虜遂乘勝渡河又獲虜間我者尚書一人福顧飲虜尚書酒問本雅失理今安在虜尚書言本雅失理聞兵來北遁去此未遠可三十里福大喜曰當疾馳擒此虜時諸軍未集皆曰此虜誘我不可信俟諸軍畢集遣精騎四偵徐議進擊否且墮虜計福不從又令虜尚書爲鄉導率衆直薄虜營與戰相持二日每戰虜輒佯敗引我兵深入福意銳欲乘虜遠力言

虜示弱給我退則乘我進則伏我惟結營自固晝揚旗伐鼓出奇兵與挑戰夜多燃炬鳴砲以張軍聲勞困虜使虜莫測不二日我軍畢至併力奮擊必大捷否亦可全師而還將軍柰何不慮此聰亦力阻福皆不從欲遣火真使虜詐求和解虜謀率精騎劫虜真猶豫未決福勵聲曰違命者斬卽上馬先馳麾士卒控馬者皆泣下諸將見元帥去不得已從行不數里虜伏四起奄至圍我遠聰率五百騎突虜陣斬虜數百人聰戰死遠馬蹶與福真忠皆被執沒虜中成祖聞敗大怒諭東宮明春朕且親征雪耻又遣使諭

順寧王馬哈木丘福敗績或本雅失理得福軍旗幟
衣甲詐劫攻爾慎防此虜以故福後不得嗣

封爵考

越國公胡大海新廟碑

宋 濂

丈夫之遇於時也生使人懷之歿使人思之且建廟
食於其土必其德澤入人之深堅如金石而弗渝信
如四時而弗爽照如日星而不忒然後足以厭乎人
心而合乎輿論也嗚呼豈易致哉若今之胡越公者
其庶幾無愧於此乎自辛卯兵興天下大亂民遭溺
焚俵俵無所棲止 皇帝手秉黃鉞起而救之屯兵
滁陽公杖策謁轅門一見語合遂居前鋒以佐揚
天威乙未春二月 王師取和州夏六月下太平丙
申春三月平金陵攻京口丁酉春三月又拔毘陵公

皆列戎行或搴旗斬將或操螯弧以先登前後屢建
奇功乃授右翼統軍元帥使宿衛帳下夏四月又從
破宣城 上命行樞密院判官鄧愈戍宣公副之秋
七月遂同諸將攻徽州拔之元將楊完者聚兵十萬
欲復其城公自婺源兼程以進橫禦而前大呼殺入
衆皆披靡而遁戊戌春三月諸將克嚴州公又偕往
降溪洞兵三萬以功遷行樞密院判官公謂蘭溪去
嚴爲甚邇蘭溪下則斷婺之右臂矣冬十月乃下蘭
溪十有二月王師取婺州陞公僉書行樞密院事公
益思有以自效己亥春正月攻陷諸暨州十有一月
又平處州庚子夏五月又拔信州信方絕糧人皆勸
公還師公曰此閩楚喉衿地也可棄之乎乃築城浚
隍爲堅守計辛丑夏五月 上憫公之勞且以婺爲
海右大藩通甌引越非宿將重臣有以控制之不可
乃授公江南等處行中書省參知政事屯戍于婺壬
寅春二月溪洞兵叛而西歸公遂遇害知公之死者
莫不哀慟流涕如喪厥父母 上聞之亦震悼弗置
親御翰墨作文以祭且命有司瘞公像配享卞忠貞
公廟庭甲辰冬復降 旨贈光祿大夫浙東等處行
中書省平章政事柱國追封越國公先是公歿之明

年公之部曲與境內之民悵然遐思若不能勝其情
乃相率卽城中作新廟一區十越月而廟成堂門庭
廡咸具及是寵褒之命下復羣謁於金華宋濂部曲
進曰公之號令素嚴人無違禁賞非無功罰非無罪
使我等攻必克戰必勝而不冒於寵靈之內者公之
賜歟我之病也孰知而起之我之凍且餒也孰察而
周之其能親自褰創注藥及安於食且衣者非公之
賜歟公之德我何以將之境內之民又進曰吾婺之
民凋瘵殊甚公專心撫摩之昔也奔走西東歲無寧
居今也長幼一堂愉愉雍雍非公之賜歟昔也商賈
不通布穀不登今也市區充溢百貨具集非公之
歟昔也厄於暴強莫敢訶問今也攘一莖茅公亦使
償之如承平時非公之賜歟公之德我亦何以將之
茲者 龍光下被爵登上公人神洽熙雲日潤明卉
木動搖如有喜色適新廟告成願爲我詳紀公之功
德以垂示於無窮是用合辭以請濂竊觀古之名將
出戍邊域者有矣得甲士之驩心則耕田鑿井之氓
必至於弗寧使斯民稍得以遂其生則持戟荷戈者
必不免於愁嘆孰有能兩全者哉若公者可謂尤賢
乎已公嘗自誦曰我不知書然吾行軍唯有三事而

已不殺人不虜人女婦不焚人廬舍故其軍一出遠
近之人皆爭趨附之蓋公處心以仁蒞事以威惟其
仁也故不言而民化惟其威也故不待戒而兵自不
敢犯昔者祭征虜制御士心不越法度所在吏民不
知有軍及其死也人爲立祠享之較之於公其事固
無大相遠也廟而祠之其誰曰不宜初公之未薨嘗
夜出人見其兩目煜煜有光若燈及其旣薨敵人數
擾我邊陲公降祥異或見夢於人或覩靈火滿野洵
洵聞人馬聲洎出師輒大捷似實有陰兵來助者是
則公之英魂烈爽下上於星辰之間固未嘗亡也因
併及之使知天之生公有非偶然者公姓胡氏諱大
海字通甫泗之虹縣人

泗國公耿再成

再成字得甫泗州五河縣人從上渡江多著勞績
自偏裨擢居帥職出鎮滁州揚州遷長興陞樞密判
官守處州至是祐之等叛再成方與客飲聞亂卽上
馬收兵不及迎賊罵曰賊奴國家何負汝乃敢反賊
將直前刺再成中頸大罵不絕口死胡琛等收其屍
槨葬之事聞上嗟惋不已立廟祀後以衣冠改葬
于金陵聚寶山追封高陽郡公擢其子天璧爲官
洪武三年進侑享太廟加贈泗國公謚武莊

郢國公馮國用

馮國用定遠人性聰敏過目成誦喜閱孫武子窮書
夜不釋有意會處輒歎曰吾當以此佐太平取功名
也甲午同弟國勝率所部謁 上於妙山 上見而

奇之曰爾被服若是其儒生耶問定天下計安出國
用對曰金陵龍蟠虎踞帝王之都願先拔金陵而定
鼎然後命將四征天下不難定也 上大悅俾居帷

幄贊兵政從克滁和引舟翊 上渡江克采石乘勝

取太平元將陳也先犯城下戰獲其全軍也先陽款
附勸 上勿聽後果被擒蠻子海牙與陳兆先犄角

窺太平國用從攻采石寨破之俘其人船蠻子海牙
僅以身遁已從 上破陳兆先營擒兆先盡降其衆
擇其驍勇者五百人置麾下五百人者多疑懼不自
安 上覺其意是夕遣令人衛環 上而寢獨留國
用一人侍臥榻防護備至 上解甲酣寢達旦疑懼
者始安進攻金陵國用率五百人先登陷陣遂拔之
還軍從克鎮江大破元師京口遂下丹陽擊寧國以
功授萬戶克甘露松山望亭又克泰興宜興授大元
帥守禦未幾陞帳前總制親兵都指揮使侍謀議從
上征金華克之遂下諸暨攻紹興卒年三十六

哭之慟築壇雞籠山祭之已肖像功臣廟位第八洪
武三年冬大封功臣 上贈郢國公子誠累有戰功
仕至右軍都督府都督弟國勝以開國功封宋國公

封爵考

追封梁國公趙德勝神碑銘

公初諱某今改賜德勝姓趙氏濠之鍾離人曾大父
小乙府君妣時氏大父省二府君妣王氏父諱仁贈
懷遠大將軍同知指揮使司事輕車都尉追封天水
郡侯妣李氏封天水郡夫人公世爲良農家狀貌魁
偉有膂力尤能馬上運槊捷疾如飛人不敢猝近歲
壬辰江淮俶擾州縣簡拔梟銳爲義兵奇公勇悍選
爲羣隊長公年甫二十有八歲帥衆接戰必操蝥弧
以爭先蹈湯赴火有不暇卹敵人望而畏之然棲棲
在下列無有旌其能功者乃走西營謁歸德王愷哥

隸麾下稍久察其馭軍無律絕類兒戲又欲擇豪傑而依之俛俛未有所歸歲甲午 大明皇帝統領大將南征駐軍滁陽公聞母夫人在軍中秋七月戊寅遂棄其妻來從及見 上轅門喜獲騎將遂賜以今名命爲帳前先鋒已而從上取鋏佛岡攻三汊河口破張家寨克全椒後河六丈大樹諸寨尋出師援六合左股爲流矢所中幾至危殆 上親臨視焉歲乙未之春閏正月剗鷄籠山羣盜與僞將韓溥酣戰直搗烏江下和州而含山次第平三月夜襲陳也先營戊申也先來侵力出關却之夏四月庚申拔板門寨五月擊長官寨遂取儀真 上錄公從戰之功超擢忠勇校尉管軍總管府先鋒六月丙辰復從 上渡大江時元兵屯牛渚劍槊如林常忠武王鼓勇先登而奪其營諸將乃下太平連攻蕪湖句容取之秋七月辛卯克溧水八月破溧陽公皆有功歲丙申春二月元將蠻子海牙闕大兵南渡擁兵建柵於采石磯以斷淮西之路時將士家屬皆留淮西 上慮其心動洵命忠武王帥師攻之公亦在遣中乃以疑兵分其勢然後出正兵與戰短戈力接奇兵遽起而乘之元將大敗而遁三月乙酉大破陳也先營於方山庚

午下金陵公之績爲諸將先丁酉 上命徐魏公取
鎮江公副之破貓簾軍水寨夏四月下丹陽金壇五
月平宣城兵鋒所及勢如破竹而所向無前矣轉承
信校尉領軍先鋒六月平廣德秋七月破僞吳張士
誠水寨九月復從忠武王攻毗陵會清軍叛與士誠
合圍魏公於牛塘王與公大敗其衆擒其梟將張將
軍歲丁酉春三月壬午取毗陵時豪傑雄爭而民心
無定向曾未幾何廣德宣城叛公復取之夏六月戊
辰取江陰秋七月丙子攻常熟張士德出挑戰公麾
兵而進士德就縛士德士誠之弟也遂征甘露望亭

無錫諸寨歲戊戌春二月公從大將攻湖州已而宣
興叛秋七月公復取之歲己亥夏四月擢懷遠大將
軍中奕左副元帥五月攻池州取青陽石埭當是時
安慶實爲荆楚咽喉之地勢不得不取秋八月公攻
之已而取無爲潛山冬十有二月復從大將征杭州
歲庚子春三月還南京會僞將朱暹來攻宜興公帥
師爲援卽搗退之夏五月僞漢主陳友諒以重兵襲
我太平境直犯龍江 皇上震怒命諸大將分據險
要授以成算而命公守虎口城虎口城龍江第一關
也旣而友諒兵大至兵陣旣交殺傷相當而伏兵忽

起山均友諒兵大敗擒戮無算遂復太平秋八月下
銅陵之臨山寨冬十月掠黃橋及馬馱沙歲辛丑春
二月征高郵夏四月陞後奕統兵元帥秋八月上
親率六師伐僞漢以報龍江之役公從行道經安慶
攻破其水寨遂乘風直泝小孤山抵九江九江僞漢
都也距九江五里所友諒始知意謂神兵自天而下
友諒宵遁遂克九江獲其玉研華蓋日月旗等物公
復分兵攻黃梅廣濟冬十月克瑞富臨江安吉諸州
復回師攻安慶下之十有一月壬申進克撫州友諒
既遁謀移都武昌公承命攻其沌口壩歲壬寅春

月從上征南昌兵至彭蠡湖南昌降三月取新淦
州已而祝其康泰據南昌叛殺守臣葉琛公率精甲
從魏公復其城夏四月甲午城破公左肩爲砲所傷
久之乃瘳上壯其爲人超授僉江南等處行樞密
院事羅友賢據池州神山寨以叛冬十又一月公與
忠武王平之僞漢餘黨建柵南昌之西山號爲八陣
指揮十又二月公從趙將軍破之俘獲三千餘人江
右州郡雖已附往往觀望狐疑未卽決歲癸卯春三
月臨江吉安富州三城叛公皆先後統兵復之上
以南昌實西江重鎮襟江帶湖控荆引粵非宗藩不

足以授綬定之寄於是詔皇姪大都督授以節鉞往蒞其地而公實統精兵受節制夏四月壬戌友諒帥強兵十萬攻圍南昌癸亥公統步卒數千闢城門迎戰僞將金指揮操戈直前公彎弧一發應弦而仆敵氣大沮而退明日復合自是晝夜環攻城友諒親督促之勢在必取公贊畫秘計分命諸將隨方應敵剪獲甚衆六月辛亥公巡城至東門敵發蹶張中其腰脅箭深入約六寸公卽拔出之且撫髀而歎曰吾自壯歲從軍傷於矢石屢矣其重無踰於此者豈命也夫然大丈夫死卽死耳復何憾所恨者不能從王

上掃清中原稍效微勳垂令名於竹帛爾丁巳遂薨於私第年三十有九軍中涕泣相弔上聞之悼惜不已遣使者來致祭冬有十一月獻護柩車至南京以丙子葬于牛首山安德鄉下堡之原上念其功復命賻以布帛菽粟有差歲甲辰春三月遂命獻代領其衆秋九月下中書議贈公榮祿大夫江西等處行中書省平章政事上柱國追封梁國公勅有司建廟南昌歲時祭享歲戊申正月乙亥上卽皇帝位國號大明建元洪武追念開國元勳皆命配享仁祖淳皇帝廟廷公位居其八實異數也

楚國公廖永安傳

廖永安字彥敬巢縣人父暉子五人永清永寧永堅
永安永忠旺扈 上渡江不仕永清以子昇贈指揮
僉事永寧早卒永堅仕陳友諒爲叅政來歸亦卒永
安少倜儻以氣自豪元季江淮兵起與弟永忠聚兵
保鄉里甲午屯湖中爲水寨以捍寇患左君弼據廬
州作亂永安等頗爲所窘乙未春聞 太祖駐和州
乃謀納款乞援 太祖大悅以歲夏五月親率兵至
巢湖援之永安與弟永忠等迎 上登舟出湖口中
丞蠻子海牙集樓舡塞馬腸河以阻諸兵 上歸和

州集商舟多載猛士至黃墩與中丞戰於裕溪敵舟
高大不利進退永安等操舟如飛左右奮擊大敗之
遂率兵入大江至青沙坊再攻中丞水寨獲鬪舡一
十五艘由是從容待上還於和州攻破鱗魚洲六月
乙卯朔永安引舟從渡江時西北風順舳艫齊發永
安舉帆前行向牛渚頃刻及岸守者大駭出兵來拒
上麾甲者以進敵不及支卽走諸軍奮擊采石兵
潰遂拔之乘勝徑克太平采石蕪湖等處蠻子海牙
僅以身遁三月統兵攻擒陳兆先復攻集慶克之得
軍民五十餘萬改集慶爲應天府置天興建康翼統
軍大元帥府以永安爲昭武大將軍統軍元帥
欲取鎮江命永安戒兵無殺掠十七日丙申克鎮江
平太沙下沙祝家等寨四月取金壇五月攻常州六
月取宣州七月張士誠兵寇瓜埠永安擊敗之十一
月徐達等圍常州永安自其壘來援內外夾擊大破
之丁酉三月常州平以功陞同僉點江南等處行樞
密院事宿衛帳下十月壬申同中翼大元帥常遇春
自銅陵進攻池州永安合攻之遂克戊戌正月與俞
通海等攻江陰石牌海寇奪馬馱沙并取宜興無錫
等處生擒朱元帥陞同知樞密事六月甲午士誠兵

寇常熟永安與戰大敗之七月庚子破士誠兵於通州狼山八月總兵征蘇州宜興復叛十月十二日與徐達邵榮復宜興既拔其城復率舟師擊士誠衆於太湖乘勝深入後軍不繼俄水淺舟膠與戰不利遂爲所獲士誠欲降之永安不屈遂拘囚之後徐達援常州士誠弟來戰達遣王玉擊敗擒士德 上喜曰士德士誠謀主其人智勇今擒之張氏之成敗可知矣遣人往求和好士德母痛之議歸永安以易 上不從士德死竟不獲歸甲辰十月 上念永安陷於強敵守義不屈遙授光祿大夫柱國江淮等處中書省平章事封楚國公賜開國輔運推誠宣力武臣有誥丙午七月丁未卒於姑蘇年四十七訃聞 上哭之慟親爲文命配祭功臣廟洪武元年十二月命築壇於雞籠山祭之二年正月丁未祭 太廟以永安配享下禮部議定謚號曰武閔



原件短缺

35-36頁

之力也八月八日我舟入江駐南湖嘴水陸結營賊舟不敢出糧且盡計窘繞江下流欲由禁江遁回俞通海等軍追擊之友諒中流矢貫精及顱而死甲辰二月攻武昌陳理出降三月陞中書省平章事四月廬州平命通海守禦廬州綏定以恩復業者衆丙午四月從取濠州九月征浙西克湖州十一月太倉崑山崇明嘉定松江降吳元年三月圍姑蘇徐相國檄通海共討賊賊敗提兵蕩其營中流矢創甚以四月九日歸自軍中 上幸其第見其病革顧曰平章知予來問疾乎通海不能語遂揮涕而出明日薨年三

八駕復臨哭之慟葬金陵城南聚寶山

齊國公丁德興

丁德興定遠人生有異徵驍勇善射甲午歸附上
偉其才貌以黑丁呼之授萬戶是年取洪山寨敵兵
勁悍且數千德興所率者纔百人一鼓破之擒其僞
帥克滁州乙未克和州敗青山寇兵從渡江拔采石
乘勝取太平元將陳也先率兵數萬突犯城下上
方策應之德興分兵從取溧水溧陽邊湖皆先登時
蠻子海牙集樓船結砦采石陳也先旣敗其子兆先
復合淮兵屯方山伺太平德興從克采石砦獲船數
艘破方山營擒兆先攻金陵取鎮江陞管軍總管下

金壇廣德宣州領精兵圍常州平陞左翼元帥宣州復叛率兵佐元帥胡大海復之遂分兵下江陰取徽州石埭池州樅陽攻江州移兵擊安慶進攻湖州皆捷復克甘露援江陰攻江西旁近州縣從攻雙刀趙克宜與先是徐達邵榮攻宜興久不下議以其城西逼太湖口張士誠餉道所由乃與德興分兵絕太湖口而併力急攻城遂拔之功授鳳翔衛指揮使攻廬州陳友諒犯龍江德興守石灰山遇戰力擊敗之是年秋從上征友諒搗安慶克九江從上往援安豐奮擊呂珍敗走左君弼引兵至復擊走之會友諒

攻圍南昌從上親征遇於康郎山死戰殲友諒遂取鄱陽十月從征陳理於武昌回攻廬州克之進征中興湖南衡州多不戰而附攻克通州高郵淮安征浙西擊常熟舊館敗士誠兵十一月下湖州降李伯昇克吳江圍蘇州將下卒於軍年四十贈都指揮使洪武元年二年肖像功臣廟追贈濟國公德興沉勇或厚仁而有信行師紀律嚴明不妄殺有功而不伐上以是重之嘗與諸將論征伐難處曰必得黑丁乃可其見重如此子三人忠授龍江衛指揮使世襲浩昶恩賜守瑩浩子廣廣子富世食田祿於江寧

蔡國公張德勝傳

張德勝字仁甫合肥人至正壬辰江淮兵起德勝與
廖永安俞通海等所部泊據巢湖結水寨以觀時變
會左君弼據廬州與黃墩將趙普勝聲勢相倚乙未
聞太祖駐師和陽乃謀通欵上大悅親帥兵至
巢湖諸將迎上登舟入江中丞蠻子海牙集船塞
湖口以阻諸兵趙普勝陰畜異志德勝等密露趙機
上歸和陽集商舟多載猛士復至黃墩攻蠻子海
牙敵船高大不利進退德勝等以小船與戰操縱如
飛左右奮擊大敗之直抵和陽營於新河是月二十

八日破鐵長官水寨新生沙寨獲人馬還授萬戶六月朔翊上渡江時風順水湧頃刻達牛渚守者駭走遂拔采石乘勝徑取太平義兵元帥陳也先與其將水陸分道寇城德勝同湯和擊其水軍會徐達鄧愈擊其步軍遂擒也先擢太平興國翼管軍總管分兵擊溧水克之是年冬蠻子海牙結采石兆先復屯營方山率衆十萬犄角相望以伺太平丙申二月攻采石砦德勝同永安以舟師進破之蠻子海牙僅以數舟遁去三月辛巳上率德勝等取集慶路大破方山營擒兆先盡降其衆庚寅克集慶得兵數十萬丙申克鎮江陞秦淮翼元帥四月克金壇八月從攻常州圍之丁酉三月常州平以功陞樞密院判官四月從克宣州五月丁太湖招降張士誠僞帥王貴等遂攻宜興八月攻馬駙沙戍戊戌正月同廖永安俞通海擊江陰石牌海寇敗之降馬駙沙陞僉樞密院事四月趙普勝以其主徐壽輝及其平章陳友諒之命自樅楊寇池州德勝帥兵往援至則守將趙忠被執城已陷矣德勝抱憤銳圖克復十月從徐達下宜興己亥三月普勝復寇青陽石埭等縣德勝統精兵與戰於柵江口破走之四月復同俞通海擊普勝大

敗其衆遂復池州九月引兵自無爲登陸夜至浮山
砦擊走普勝將胡總管敗之於青山追至潛山界陳
友諒叅政郭泰領兵至沙河迎戰德勝復大破之斬
郭泰獲軍資無算遂克潛山庚子五月陳友諒以重
兵襲太平遂直犯龍江 上大怒命諸將據險以禦
以德勝總水陸大軍擊之旣而陳氏兵大至陣旣交
殺傷相當德勝乃從中大呼麾諸將士奮擊友諒敗
走斬獲不可勝計 上遣德勝與徐達馮勝等追友
諒至采石與大戰德勝死於陣追封蔡國公洪武三
年贈開國輔運推誠宣力武臣光祿大夫柱國同知
大都督府封爵如故六年三月謚忠毅侑享 太廟
子宣中軍都督府僉事坐累降神策衛指揮同知宣
子翬孫昂旻曾孫勇玄孫淮源世襲廬州衛指揮同
知

蘄國公謚武義康茂才神道碑銘

皇帝卽位之三載混一華夷聲教所被罔間遐邇梯
山航海奉贄獻琛 上念熊羆之士不二心之臣東

征西伐宣勞有年方將胙土分茅以定功賞而都督
康公薨于陝州 上聞之嗟悼不已旣勅有司穿土
作室以寧體魄復欲昭其功勳於悠久 詔翰林學

士臣宋濂稽諸簡牘所書文於堅石以垂示於億萬
載臣濂謹按公諱茂才字壽卿康其姓也世爲蘄州

人曾祖文廣 皇贈中奉大夫中書參知政事護國

追封京兆郡公祖德懋 皇贈資善大夫中書右丞

上護軍追封京兆郡公父壽 皇贈榮祿大夫同知
大都督府事柱國追封蘄國公母蕭氏追封蘄國夫
人公當元之季四方雲擾未幾蘄州陷公結義旅以
捍蔽爲務授以長官俄遷爲鎮府同諸將復九江擣
蘄水黃連寨轉蘄州路同知總管府事屯戍和之裕
溪太平之采石使者考其功狀陞淮西宣慰副使同
知元帥府事又陞宣慰使都元帥歲乙未六月 上
帥師渡江將士家屬尚留於和州 上慮公扼采石
之衝弗獲渡時出兵挑戰公兵雖寡而以寬弘得士
卒心故臨陣人多效死於是數戰不克後數月常忠

武王遇春遣游兵虛撓之連日發軍以應王度其力
疲夜設伏兵質明殲其精銳殆盡然猶收合潰散堅
寨於天寧洲明年二月 上命諸將以襄陽大砲破
其寨公奔行臺便宜陞淮南行省參知政事甫踰月
上亦克金陵又奔京口舟師追及之公度天命有
歸乃率所部餘兵三千解甲來附免冠頓首言前日
戰各爲其主今日屢敗天數也事至於此死生唯命
苟得生全尚竭犬馬之力以圖報效 上笑而釋之
仍許統所部兵從征又明年授秦淮翼水軍元帥守
禦龍灣取江陰之馬馱沙八月僞吳張士誠犯我疆

境公驅兵逐之獲其樓船 上賜名馬一疋黃金一錠歲戊戌從廖楚公安攻池州取趙雙刀之樅陽遷都水營田使兼帳前總制親兵左副指揮使明年八月攻皖城僞將率樓船出戰公復獲之又明年六月僞漢陳友諒傾國入寇攻陷我姑孰殺戮我吏民意將窺我南京 上召公謂曰爾不疑我乎公復頓首謝 上曰汝既不相疑宜作書遣使僞降友諒爲內應招之速來仍給告以虛實使分兵三道以弱其勢友諒果如所言暨至諸將同公奮擊大破之縛其士卒二萬有幣帛白金之賜歲辛丑八月 上怒友

諒來寇率將士親征公領舟師行擊安慶破江州僞都友諒西遁遂下蘄州與國漢陽公沿流而下克黃梅某家寨十一月取江之瑞昌敗友諒八陣指揮友諒之勢遂衰遷帳前親兵副都指揮使明年九月復龍興又明年攻左君弼於廬州四月友諒圍龍興上親往援公與諸將皆從友諒聞 上至亟解圍還七月大戰於彭蠡湖軍聲嘯呼湖水爲之起立浮屍蠢蠢動至數十里友諒遂至敗亡又有幣帛之賜十月 上親征武昌公從之歲甲辰二月下之友諒之子理銜璧出降三月進金吾侍衛親軍都護府副都

護四月從大將軍徐公達游攻廬州七月下之八月
拔安豐繼取江陵及湖南諸州加賜幣帛明年二月
改神武衛指揮使五月進大都督府副使閏十月士
誠兵犯江陰京口 上帥大軍水陸並進公在行中
及至鎮江士誠兵已遁又明年正月追至巫子門擊
敗其衆獲士卒三千公功爲尤多四月搗淮安之馬
邏港拔其水寨復獲士卒與艨艟無算淮安平七月
遂攻湖州十一月破之進逼姑蘇姑蘇士誠僞都卽
遣銳卒死迎鬪大戰尹山橋公持戟督戰益力銳卒
盡覆乃進圍齊門刀劍林立飛鳥不敢下大將軍命
諸將合攻之吳元年九月姑蘇平公取無錫州十月
陞同知大都督府事兼 太子右率府使進階榮祿
大夫洪武元年 上以江南之地旣入版圖乃遣大
將軍經略中原公從定齊魯之地復由黃州取汴梁
下洛陽駐師陝州規運饋餉造浮橋以渡大軍鎮河
中善撫綏遺民爲之立石頌德絳解二州則公所招
徠蔽遮潼關秦人不敢東向二年復從大將軍征漢
中奉詔還軍中道因疾而薨實八月之三日也年五
十有七上下廷臣議贈公推忠翊運宣力懷遠功臣
光祿大夫湖廣等處行中書省平章政事柱國追封

新國公謚曰武義

河間郡公俞廷玉傳

俞廷玉本濠州滿塘人至元戊寅遷居巢至正壬辰
江淮兵擾以妖惑衆人多應之廷玉從其部屬李普
勝甲午彭事解廷玉與子通海通源通淵泊舟巢湖
結廖永安等聯絡爲水寨以捍寇亂妖黨左君弼據
廬州恒出兵窘之諸將鬱鬱不得志乙未春 上駐
蹕和州廷玉以書納欵備述君弼梗道之故未幾
上親至巢湖援之而出適中丞蠻子海牙擁兵阻河
口雙刀趙屯黃墩陰畜異志廷玉傾心共謀委身翼
衛戰退中丞兵旣抵和陽遂於裕溪河鱗魚洲等攻

寨有功授萬戶扈從渡江拔采石取太平擢管軍總
管攻邊湖水陽克花圩溧陽顧城湖民寨太平河三
汊口丙申縱火焚敗中丞水寨破陳兆先陸寨三月
定臺城克鎮江陞元帥取丹陽丁酉克寧國長鎗軍
戍池州樅陽己亥四月克柵江營獲趙牛兒等舡復
池州擒僞元帥洪鈞等陞僉樞密事九月 上命廷
玉總領戰船軍士攻取安慶沒於陣贈龍虎將軍上
護國同知樞密院事追封河間郡公

姑孰郡公陶安

陶安字主敬當塗人少敏悟有大志博涉經史元書
院山長乙未與耆儒李習率父老出城迎 上召語
時事安曰今豪傑爭雄志在子女玉帛非有撥亂救
民安天下之心明公率衆渡江神武不殺人心悅服
以此順天人行弔伐天下不足平也 上曰善吾欲
取金陵何如對曰金陵古帝都龍蟠虎踞限以長江
據其形勝出臨四方何向不克 上又曰善留叅幕
府丙申從克金陵陞左司郎中贊機務旣而得劉宋
章葉四公 上問四人者何如對曰臣謀略不如基

議禮
刪修

學問不如濂治民之才不如溢琛辛丑知黃州寬賦
省徭招徠流亡民庶悅服甲辰移知饒州賜詩行時
方征伐用急安善諭民樂輸軍興不乏乙巳信州賊
攻城安與千戶宋炳率吏民分城拒守選勇卒爲游
兵晝夜巡捍請救江西行省安登城諭賊曰爾皆吾
民反爲賊用得無失計乎衆曰使皆如太守豈有今
日城卽破不相害會援兵至賊大敗遁去諸將怒請
盡屠諸從賊者安曰民爲賊脅非本心奈何殺之不
許明年入朝吳元年初置翰林院爲學士知制誥修
國史時召四方宿儒集議禮制安總裁定修律爲議

事官洪武元年

上與儒臣論儒學術安對曰道之

不明邪說害之也 上曰邪說害道猶美色眩目鮮

不爲惑自非豪傑不能決去夫邪說不去則正道不

興正道不興天下烏得而治安頓首曰主上探本至

論 上嘗賜安對國朝謀略無雙士翰苑文章第一

家御史有言安隱過者 上曰朕素知安安豈有此

且爾何從知對曰聞之道路 上曰御史取道路言

毀譽人以此爲盡職乎立黜御史初置山東行中書

省調江西叅政汪廣洋山東安出江西爲叅政 上

曰朕渡江初卿首率父老見軍門爲朕陳王道論時

亦御
史言
隱過

狀教錄

卷之六

四

晏山館

務深合朕心朝夕幕府裨益良多繼入翰林益聞讜
論江西上游都會擇卿撫治對曰臣微陋恐付託不
效負聖恩安寬仁達吏事政績益著四年卒年五十
七疾劇猶草上時務十二事贈姑孰郡公國初諸禮
多安裁定大祀禮專用安議

濟陽郡公丁普郎

丁普郎初爲陳友諒將守小孤辛丑八月王師征友
諒次小孤普郎迎降用爲將從征有功授行樞密院
同知七月己丑與友諒戰死身被十餘創首脫猶執
兵若戰狀植立舟中不仆贈濟陽郡公

樂浪公濮真

濮真鳳陽人國初從舉義以忠勇被遇渡江取姑孰
定建康拔維揚下毘陵克宣歙池婺諸州平江西九
江南昌吉安撫州湖廣武昌淮東泰州收平江閩浙
征進中原河洛關陝皆有功歷陞都督僉事洪武初
征高麗兵敗被執高麗王詰之曰汝無故而加兵吾
境亦有說乎真曰我主上神文聖武撫有華夷一
視同仁爾國叛服不常主上怒其欺肆不忍卽加
征伐數遣使諭意爾不奉若上旨故始命將聲討
豈爲無故能悔過效順庶幾轉禍爲福王愛其驍勇

徐曰吾欲用爾爲將亦不失富貴何如真勵色曰吾爲天朝大臣視爾夷君猶若下風敢以此望我耶王怒欲兵之真乃罵曰夷虜爾害吾吾主必滅爾國爾不知吾大丈夫有赤心肯爾屈耶卽剖心以示之而死王初意止欲迫脅真不虞真之死也真死王大惟遣人入朝謝罪併歸真從行兵士上曰濮真當危難秉義不屈忠節可嘉追贈樂浪公謚忠襄表其門曰班超羣將志邁雄帥時真子璵生甫數月卽襁褓中封西涼侯除

御製推忠報國協謀宣力文臣特進榮祿大夫

上柱國公姚廣孝神道碑

朕惟商宗得傳巖之叟以佐中興漢高用赤松之流以成大業蓋天之生斯人也豈偶然哉惟我太子少師姚廣孝蘇之長洲人祖菊山父鈔心皆積善母費氏廣孝器宇恢弘性懷冲澹初學佛名道衍潛心內典得其闢奧發揮激昂廣博敷暢波瀾老成大振宗風旁通儒術至諸子百家無不貫穿故其文章闕嚴詩律高簡皆超絕塵世雖名人魁士心服其能每以爲不及也洪武十五年僧宗泐舉至京師朕皇考太

祖高皇帝一見異之命住持慶壽寺事朕藩邸每進見論說勤勤懇懇無非有道之言察其所以堅確有守積純無疵朕益重之及皇考賓天而奸臣擅命變更舊章構爲禍亂危迫朕躬朕惟宗社至重匡救之責實有所在廣孝于時識進退存亡之理明安危禍福之機先幾效謀言無不合出入左右帷幄之間戩沃良多內難旣平社稷奠安乃召至京師命易今名特受資善大夫太子少師旣又賜之誥命祖考皆追封資善大夫太子少師如其官朕命儒臣纂修皇考太祖高皇帝實錄廣孝爲監修官躬自校閱克勤所

事嘗歸吳中以所賜金帛悉散之宗族鄉人其平生樂善好施天性然也永樂之六年三月來朝北京仍居慶壽寺朕往視之與語極謹至二十八日詔諸門人告以去期卽斂袂端坐而逝享年八十有四朕聞之哀悼不勝輟視朝二日命有司爲治喪葬追封榮國公謚恭靖贈以勳號百司官僚暨畿內士庶遠近傾赴肩摩踵接填廓塞衢雖武夫悍卒閭巷夫婦莫不贊嘆嗟咨瞻拜敬禮惟恐弗及凡七日儀形如生異香不散卜地西山礮石建塔四月六日發引靈輻飄灑法幢旋繞于以火之心舌與牙堅固不壞得舍

利皆五色其所養深矣六月十一日乃葬墓在房山縣東北四十里嗚呼廣孝德全始終行通神明功存社稷澤被後世若斯人者使其栖栖于草野不遇其時以輔佐興王之運則亦安得播聲光於宇宙垂功名於竹帛哉眷惟耆艾功深念懷乃揚其功德之不可泯者勒之金石以詔來人

資善大夫太子少師贈榮國公謚恭靖姚廣孝

傳

王 鏊

姚廣孝長洲人初爲僧名道衍字斯道居相城妙智菴時相城靈應觀道士席應真者讀書學道兼通兵法家言尤深於機事廣孝從之執弟子禮於是盡得其學然深自退藏人無知者其友王行獨深知之曰他日必當有所遇固不得以人廢言也洪武中以高僧薦選侍文皇於燕邸深見親信與密謀永樂中以靖難功進官太子少師復姓賜今名擬於元之劉秉忠卒贈榮國公謚恭靖配享廟廷初靖難之功廣孝第一事定未嘗自言文皇屢欲官之輒辭一日召見令人潛以冠服被體亟命宣謝不得已受命終不蓄髮娶妻所居多在僧寺然文皇眷禮彌篤每稱少師而不名及病篤幸其第問後事對曰出家人復何所戀

強之終無言文皇念其功特官其養子姚繼爲尚寶少卿廣孝博通內外典亦工文詞所著有逃虛子集別有道餘錄則專詆程朱其友張洪嘗云少師於我厚今死矣無以報之但見道餘錄輒爲焚棄

故元國子祭酒孔克堅

克堅字璟夫孔子五十五世孫少通敏日誦千餘言始冠遊學成均通春秋左氏傳其父沒襲封衍聖官階嘉議大夫元統間上疏請修廟像順帝賜山東曆日錢之半給其費且命其族人監察御史思立持楮幣二萬五十緡勒碑以紀其績至正六年中書省臣以衍聖公爵高階卑不稱奏陞之制受中奉大夫易銅印以銀十五年平章政事達識帖木兒薦其明習禮樂徵爲同知太常禮儀院事以子希學襲爵是年冬順帝親郊克堅攝太常使人稱其達禮御史大夫

雪雪言其才可大用拜中臺治書侍御史辭歸明年
拜山東肅政廉訪使復辭會山東兵亂率家人北行
次藁城適丞相賀太平奏起克堅爲集賢直學士希
學爲秘書卿克堅至燕都時劇盜毛貴犯畿甸甚逼
廷議欲遷關中克堅曰天子當與社稷宗廟俱爲存
亡烏可棄而他之今勤王之兵頗衆與之決戰必可
平也如其言盜果敗去十九年遷禮部尚書知貢舉
時四方士避亂多集都邑克堅請設流寓科以取之
是冬擢陝西行臺侍御史二十二年除國子祭酒順
帝賜上尊太子書大成殿額以賜克堅以世亂不樂
居位謝病歸闕里後再起爲集賢大學士復拜山東
廉訪使卒不起大兵取山東克堅入見時 上遣使
以書起之會克堅至待以賓禮賜廩祿不煩以職事
郊社必致膳肉撫勞甚至是年以疾告遣中使存問
疾薦詔給驛還家賜白金百兩文綺八端行次下邳
新安驛卒於舟中壽五十五希學奉喪歸葬於孔林
克堅寬厚樂易事親有禮遇族黨有恩與人交一以
誠信豐下美髯容止甚雅順帝常以福人稱之娶張
氏濟寧路總管張子仁女元封魯郡太夫人子九人
長卽希學次希說希範希進希麟希鳳希顏希尹皆

元國子生其季曰希贊

衍聖公孔希學

希學字士行先聖五十六代孫也父克堅元襲封衍聖公至正十五年召爲同知太常禮儀院事乃以希學襲封年始二十一山東盜起克堅時已罷政家居懼汙于亂率其家北走燕都希學從行次藁城丞相賀太平聞之奏以克堅爲集賢直學士希學爲秘書監卿召入燕都久之亂益甚父子皆不樂居位謝病歸吳元年冬大兵取中原都督張興祖兵至東平諸郡皆降希學乃與其從兄曲阜縣尹希章謁見興祖

洪武元年大將軍徐達至濟寧希學謁見於軍門達遣人送希學赴闕是年冬十一月詔襲封如故繼從入覲屢加賜予每正旦上受四方朝賀特命希學班亞丞相先聖廟庭自兵後日就圯壞希學力修葺之復祭田侵於豪民者五十餘頃禮器禮服樂舞儀式以次備舉至是疾卒年五十七詔禮部遣官致祭

衍聖公孔彥縉

彥縉字朝紳先聖五十九代孫也十歲襲父鑑爵太宗皇帝命教於太學久之遣歸仁宗賜第於東華門正統間幸太學有襲衣冠帶之賜明年來朝又

有銀印玉帶織金麒麟之賜至是卒年五十五 帝
遣禮部主事周騏往致祭并令有司治喪葬孫弘緒
嗣爵

衍聖公孔弘泰墓誌銘

李東陽

公諱弘泰字以和爲宣聖六十一代孫自國初衍聖
公希學傳三世至彥縉公祖也考承慶未封而卒贈
衍聖公二子長弘緒字以敬襲爵十有六年公實代
襲越三十有四年而卒公生七月喪父六歲喪祖賴
母王太夫人鞠成之成化庚寅始襲封 憲宗皇帝
賜第京師命齒國學嘗見公所服玉帶遣人問焉公

對曰臣家門故事累朝恩數不可廢也許之再值郊
祀分獻內壇皆出親定壬辰辭歸 上若曰卿其進

學循禮表率宗族無忝聖裔以副朕懷丙辰給誥命
有司以二品例授犀軸公言舊典以玉軸爲異乃改
授之丁酉詔加廟祭禮樂公率族人奉表入謝先世
有遺田百餘年散業他姓者過半至是皆贖歸之以
贍羣族巳亥祖廟爲雨水所壞公請命有司修葺完
麗如故每歲 萬壽聖節奉表獻馬賀于廷辛丑居
母憂賜葬祭皆如例丁未入臨 憲宗大喪今 上
登極以弘治戊申入賀 上視學命分獻兗國公賜

坐彝倫堂退率三氏子孫表謝復賜晏禮部及襲衣
冠帶躬耕籍田亦預宴焉己未公來朝聞祖廟災亟
歸齋哭如居喪引咎自責居鬱鬱不樂庚申力疾而
朝辛酉上疏乞休致 上若曰卿其善自調攝以奉
聖祀所請弗許時復有修廟之役公協相規畫勞勩
甚殷凡再越歲弗克躬覲事病革執兄子聞韶手若
有所屬者蓋公之封也廷議以爲世嫡相傳古今通
義乃按宋故事俟公之後仍歸其兄之子公母遺命
亦以是公及見聞韶之成其乞休時嘗具名以請故
三定猶惓惓云訃聞 上特遣行人諭祭者五有司

給棺槨工部官屬治葬事以某月日窆焉公美風儀
善論議每評騭人曲直料事當成敗多奇中俾有職
務將無不可爲者而靜處優逸無繇自見然承奉宗
祀修治林墓綜制家政其在孔氏有勞績焉若孝友
無間之心剛毅不屈之氣榮名令聞偉然著于人人
其在天下亦不可泯也嘗卽魯泮池遺址築東莊別
墅因以自號有東莊稿藏于家公生景泰庚午四月
二十七日卒于癸亥五月十五日年五十有四娶護
衛千戶永之女封公夫人子聞詩三氏學生

衍聖公孔聞韶墓誌銘

嚴 嵩

先聖孔子修明帝王之道以詔後世繇漢以來世主
既崇祀之又爵其裔孫一人使主祀事以崇成奉聖
文宣代殊其稱至宋始封衍聖公然猶兼領他職或
止署爲郎其秩視上公品高位重專宅闕里以恭奉
廟祀惟我朝之制爲然其所以崇寵之者視前代爲
至弘治末衍聖公弘緒以疾告於是成菴公以世嫡
承襲其爵公諱聞韶字知德宣聖第六十二代孫也
年弱冠召至闕下美風儀 孝宗皇帝面賜玉帶麒麟
服人咸榮之時少傅西涯李公名重海內登公于
門歸以其子一時傾動朝著有冰玉之稱焉正德改

元視學召公爲分奠官命坐彝倫堂聽講賜茶仍賜
宴禮部賜衣帶寶鏹丁卯入賀賜御製迴文詩庚午
復入賀屬疾命醫診視頒賜上尊珍饌夫人以歸寧
卒於京邸詔遣官諭祭驛歸其喪賻給甚厚 皇上
兩視學皆驛召公觀禮而常賜外加賜金織麒麟緋
服一襲及冠帶各一以示優異公每值 萬壽聖節
奉表入賀比歲患疾艱於拜起然尤力勉以來甲辰
復來 上溫旨慰之免其朝賀踰年疾甚卒於家丙
午二月十一日也訃聞詔賜祭葬如例公生成化壬
寅八月十八日享年六十有五元配李卽西涯公之

女繼配衛宣城伯璋之女封皆夫人男子二人長曰
貞幹今襲封衍聖公次曰貞寧公性質敦重不苟言
笑識達世故施于有政厥績爲多孔氏祭田蠲租尼
山洙泗二書院各設學錄一員典教事鄒縣故有子
思子祠特受公弟聞禮爲五經博士使主祀事皆從
公之請也闕里故有志殘缺公請西涯公編輯之以成巨典
劉賦之亦疏請城闕里而遷曲阜縣創義倉以歲給二氏子
孫之貧者其所建立章章如是事繼母袁夫人及生
母江以孝稱居喪一準禮制而友愛其五弟尤至弟
皆先卒撫其孤如子敬禮士大夫來謁闕里者皆款
接盡懽焉

卷之六終

